

<County: Yorkshire East Riding>

<Code: L1122>

<MS reference: Beverley, Corporation Records, Great Guild Book, f. 23r>

<Text: Award>

Be it to haue in mynde y^t ye Monday ye xxij day of Januar~ ye ix 3eer~ of kyng henry ye sexte
 Robert Aldegat of Beuerlay & Richard
 Fauconer~ of Beuerlay be thair~ comun assent put thaym in ye award of Willam Wiltonn and
 Thomas Wilton@ of Beuerlay arbitours
 Chosynn for ye said Robert and Thomas Dauell & Willam Crosseby of Beuerlay Potter~ arbitours
 chosynn for ye said ~~Robert~~ Richard for to
 trete of alle maner~ of maters accouns querels & claymes hyngand mouyd or had by-twys ye said
 Robert & Richard . And ye same Richard
 & Robert were swornn opon a+boke in ye Mynstir~ of Beuerlay befor sir Willam Cotyngham to
 abide ye ordinaunce awarde & Jugement
 of ye seid Arbitours in ye accouns querel & claymes aboun-said . The whilke arbitours ye Friday yan
 next folowyng in ye Gilde halle
 of Beuerlay bifor ye xij . Gouernours of ye seid ton~ made ther~ award in ye maner~ and forme y^t
 folous / First yay haue awardid y^t ye seid
 Robert & Richard sal be ful frendis & in ful charite aythir with othir w^t-outyn~ varians Also yay
 haue awardid yat ye seid Richard
 schal haue & halde to hym & to his heyris a hous callid a goddislofhous in Walkergate next to ye
 hous of ye seid Richard to this
 intent yat he & his heiris sal putte in-to ye said goddislufhous twa pour~ men or twa pour~ women
 ther~ for to dwelle what
 tyme y^t he is deuly requerid & prayed w^t-outyn~ any giffte gevyng be any swylk maner~ of man or
 woman abounsayd . And
 also y^t ye seid Richard & his heyris sall sustynn & reparell ye seid goddislufhous in alle maner~ of
 thyng at their~ awne costis
 in tyme to come And also yai haue awardy y^t ye seid Robert Aldegat sall haue & hald to hym & to
 his heirs ye tothir goddislufhous
 next to ye todir in walkergate to this intent y^t he & his heyris sall puttyn~ in ye seid goddislufhous
 twa pour~
 men or twa pour~ Womenn ther for to duell what tyme y^t he is duly requerid & prayed w^t-outyn any
 gift gifyng be any swylke maner

of man or womann abounn-sayd . And also ye seyd Robert & his heyris sal susteyne & reperell ye
 seid goddislufhous in al maner~ of thynges
 at yer aune *propir* costis in tyme to come Also yay haue awardid y^t gif ye forseid Richard or his heirs
 refuse to putte in-to the
 seid goddislufhous twa pour~ men or twa pore womenn in maner~ als it is abounn-said or ellis y^t ye
 seid Richard or his heirs
 will noght reparell & susteyne ye seid goddislufhous to ye intent abounn-said ; then ye seid Robert &
 his heiris schal entre
 haue & halde ye seid goddislufhous next to ye place of ye seid Richard w^t-outyn lettyng of hym or of
 his heirs to ye entent aboun-seid .
 Also yai haue awardid yat if ye seid Robert or his heirs refuce to put in ye said goddislufhous a
 pour~ mann or a pour~ womann
 in maner~ as it is aboun~-seid or ellis y^t ye seid Robert or his heirs will noght reperell & susteyn ye
 seid goddislufhous next to
 ye tothir to ye intent aboun-said yan ye seid Richard & his heirs sall enter haue & hald ye seid
 goddislufhous next to ye
 tothir w^t-outyn lettyng of ye seid Robert or of his heirs to ye entent aboun~-said Also thay haue
 awardid y^t if ye seid Robert
 or Richard or thair~ heirs faill of puttyng in of pour~ men or womenn in forme aboun~-seid or ellis
 of reparacion in forme beforsaid
 yat yan he y^t is in ye defaute pay vn-to ye xij men & comonalte of ye ton~ of Beuerlay xx s . als ofte
 as yay faile . And
 ye seid Robert sal close vp ye dore on ye West side of ye seid hous / . And also y^t yer~ be no
 wyndow on ye west side of ye
 seid hous vnder ye entirtays . And also y^t al maner~ of accions querell & claymys sal sese be-twene
 thaym & be determynd
 befor this awarde . And also y^t if pour~ men or pour~ womenn deuly requere ye seid Robert or
 Richard or thair~ heirs for
 to be putt in ye said hous what tyme y^t yei er voide & ye seid Robert & Richard or thair~ heirs refuse
 to put thaym in
 y^t yan ye xij gouernours of ye seid ton~ for tyme beyng ordeyn remedy be thair~ discrecion~ .